



## **Xina nia re-balanseamentu ekonómiku pró-kiak sei fó benefísiu ba rain Ázia-Pasífiku sira-seluk**

Bainhira Governu **Xina** inisia nia reformasaun polítika longu-prazu hodi hamenus mundu nia segundu maior ekonomia nia dependénsia dominante ba esportasaun no dezenvolve motivu kresimentu bazeia-ba-demanda doméstika liuhosi dezenvolvimentu inkluzivu, ekonomia sira-seluk iha rejiaun nia laran bele mós hetan benefísiu.

“Mezmuké iha redusaun ba kresimentu PIB iha Xina, ne’ebé mosu nu’udar rezultadu hosi investimentu menus, ekonomia xinesa motiva badadaun hosi konsumu sei fó benefísiu ba esportadór sasán konsumu sira iha rejiaun laran liuhosi penetrasaun aumenta ba merkadu xinesa,” hatete *Levantamentu* ne’e.

ESCAP nia estimasaun sira hatudu katak ida-ne’e bele aumenta esportasaun hosi rai Ázia-Pasífiku sira-seluk ba Xina sa’e besik \$13 billaun durante período 2013-2015, ho kresimentu esportasaun rejionál sa’e besik porsentu 0,5 liu nivel ne’ebé nia bele hetan se karik Xina la halo re-balanseamentu.

Makaer polítika sira iha Xina deklara ona rain ne’e nia Vizaun atu hadi’ak “kualidade kresimentu nian” liuhosi empoderizasaun ekonomikamente ba ema-kiak, ho objetivu atu estimula konsumu doméstiku to’o nivel iha-ne’ebé nia bele halo parte ekonómiku ne’ebé to’o ohin-loron baibain halo hosi esportasaun no investimentu ba infraestrutur.

Governu nia Planu tinan-lima ba dala sanulu-resin-rua sei ezbossa medida sira hodi muda ekonomia sees hosi dependénsia esternu no to’o dalan kresimentu longu-prazu sustentavel ne’ebé motiva hosi demanda-doméstika. Planu ne’e sei mós buka atu hamenus papél investimentu nian iha demanda doméstika no hasa’e parte desproporsionalmente ki’ik konsumu nian.

Hodi tuir objetivu ne’e, iha Feveireiru 2013, Governu anúnsia nia planu atu hasa’e ema na’in tokon 80 hosi pobreza to’o 2015, inklui liuhosi aumentu signifikativu ba saláriu rurál mínimu, reformasaun ba sistema rejistrasaun umakain hodi fó dalan ba migrante rurál sira atu hetan seguransa sosiál no direitu sira-seluk ne’ebé baibain mak disponivel mesak de’it ba sidadaun rejistu-urbanu no halo sistema koleasaun impostu sai progresivu no ekuitavel liu.

Reforma hirak-ne’e sei halo Xina nia kresimentu inkluzivu liu no bele mós halo impaktu pozitivu ba ekonomia Ázia-Pasífiku sira-seluk. Análize ESCAP nian hatudu katak maioria rain Ázia-Pasífiku sira sei hetan benefísiu hosi Xina no re-balanseamentu. Mask aumentu ba Xina nia konsumu doméstiku iha projesaun atu ki’ik liu fali redusaun ba investimentu, maioria esportadór Ázia-Pasífiku sira ba rain ne’e sei manán tanba sira-nia dependénsia ba merkadu sasán konsumu Xina nian mak boot liu fali sasán kapitál nian. **Nova Zelanda** sei hetan benefísiu barak liu ho nia vendas ba Xina projeta atu aumenta sa’e maizumenus porsentu 0,49 durante período 2013-2015.

Ho hanoin kona-ba prospeitu kresimentu restritu iha merkadu esportasaun mundu dezenvolidu nian, makaer polítika sira iha ekonomia Ázia-Pasífiku iha dezenvolvimentu sei presiza monitoriza didi’ak natureza demanda ne’ebé evolve bá beibeik iha Xina bainhira sira buka atu hetan benefísiu hosi poténsiál ba komérsiu iha rejiaun nia laran.